

DIE TWEEDE BRIEF VAN PETRUS

Inleiding

In die aanhef word vermeld dat hierdie brief van die apostel Petrus afkomstig is. Dit kan aanvaar word dat die apostel Petrus, dit kort voor sy dood in 64 nC, of miskien in 68 nC, en waarskynlik vanuit Rome geskryf het. Die gehalte van die taal en styl van die brief verskil aansienlik van dié van *1 Petrus*.

Volgens 2 Petrus 3:1 is die ontvangers van hierdie brief dieselfde as dié van *1 Petrus*. Die ontvangers van hierdie skrywe word ernstig deur dwaallerings bedreig (2:18).

Naas die feit dat *2 Petrus* 'n brief is, vertoon dit ook eienskappe van 'n geestelike testament (1:12-15), wat die apostel skryf terwyl hy weet dat hy binnekort gaan sterf (1:14). Hy vermaan hulle wat agterbly, vir oulaas oor hoe hulle moet optree ná sy dood (vgl veral 1:13-15). Die brief plaas sterk klem op die Skrif asook die kerklike oorlewering, trek skerp te velde teen die dwaalleer en wei uit oor die eindtyd. Die ooreenkomste tussen *2 Petrus* en *Judas* is opvallend. Daar bestaan vandag 'n groot mate van eenstemmigheid dat *2 Petrus* ruimskoots van *Judas* gebruik gemaak het.

Die vals leraars en spotters se openlike aanvaarding en bevordering van die dwaalleer en 'n losbandige lewe, asook hulle ontkenning van die wederkoms (2:1 — 3:13), was waarskynlik die hoofrede vir die skryf van *2 Petrus* (vgl veral 3:1-4). Die brief roep die lesers op om vas te hou aan

die ware evangelie soos dit aan hulle oorgelewer is. Vir gelowiges beteken die wederkoms die ontvangs van die volle erfenis wat God beloof het (1:4; 3:13); vir ongelowiges beteken dit egter vernietiging, straf en oordeel (2:3,9). Verder word die lesers opgeroep tot 'n onberispelike lewe en volgehoue geestelike groei.

Die boek kan soos volg ingedeel word:

1:1-2 Brieffaanhef

1:3-15 Oproep tot geestelike groei

1:16-21 Betroubaarheid van die getuienis

2 Vals profete en leraars

3:1-18a Doel van die brief en verwagting van die wederkoms

3:18b Lofprysing

1

¹ Simeon •Petrus, 'n dienskneg en •apostel van Jesus •Christus, aan^a dié wat dieselfde kosbare geloof as ons verkry het deur die •geregtigheid van ons God en Verlosser, Jesus Christus:

² Mag genade en vrede in oorvloed aan julle geskenk word* deur julle kennis van God en van Jesus, ons Here.

Oproep tot geestelike groei

³ Sy goddelike krag het ons immers reeds alles gegee wat ons nodig het vir 'n godvresende lewe, deur die kennis van Hom wat ons deur sy majesteit en goddelike krag geroep het.*

⁴ Hierdeur het Hy sy kosbare en grootse beloftes reeds aan ons gegee,

^a**1:1 aan:** In die formele briefstyl soos deur die skrywer gebruik, ontbreek die werkwoord wat in die gedagte aangevul moet word, naamlik “skryf” aan.

***1:2 Mag ... word:** 1 Pet 1:2; Jud vs 2

***1:3 kennis ... geroep het:** 1 Pet 2:9

sodat julle deel kan kry aan die goddelike natuur, noudat julle ontvlug het aan die verdorwenheid wat deur begeerte in die wêreld teenwoordig is.

⁵ Lê juis daarom alle ywer aan die dag om

by julle geloof deug te voeg,

by deug, insig,

⁶ *by insig, selfbeheersing,

by selfbeheersing, volharding,

by volharding, godvresendheid,

⁷ by godvresendheid, broederliefde,^b en

by broederliefde, liefde vir alle mense.

⁸ Immers, wanneer julle oor hierdie eienskappe beskik en daarin toeneem, sal dit daartoe lei dat julle nie nutteloos en sonder vrug is wat julle kennis van ons Here Jesus •Christus betref nie. ⁹ Want die een by wie hierdie dinge ontbreek, is blind en kortsigtig en het vergeet dat hy van sy vorige sondes gereinig is.

¹⁰ Daarom, broers,^c lê julle soveel te meer daarop toe om julle roeping en verkiesing stewig te vestig. Want as julle hierdie dinge doen, sal julle vir seker nooit struikel nie. ¹¹ Ja, so sal toegang tot die ewige •koninkryk van ons Here en Verlosser, Jesus Christus, ryklik aan julle voorsien word.

¹² Daarom sal ek julle altyd aan hierdie dinge bly herinner, al weet julle dit reeds* en al is julle reeds stewig in die bestaande waarheid gevestig.

¹³ Ek beskou dit as gepas om julle deur herinnering op te skerp so lank as

* **1:6-7** Gal 5:22-23

^b **1:7 broederliefde:** Liefde vir medegelowiges.

^c **1:10 broers:** Volgens destydse opvatting was die susters hierby ingesluit.

* **1:12 sal ek ... dit reeds:** Jud vs 5

wat ek nog in hierdie tentwoning verkeer; ¹⁴ want ek weet dat my tentwoning binnekort afgebreek sal word* — soos ons Here Jesus Christus dit ook aan my duidelik gemaak het.* ¹⁵ Daarom sal ek my ook daarvoor beywer dat julle hierdie dinge ná my heengaan steeds in herinnering sal kan roep.

Betroubaarheid van die getuienis

¹⁶ Ons het ons immers nie op vindingryke fabels verlaat toe ons die kragtige teenwoordigheid van ons Here Jesus •Christus aan julle bekend gemaak het nie. Inteendeel, ons was ooggetuies van sy ontsagwekkende grootsheid. ¹⁷ *Nadat Hy van God die Vader eer en heerlikheid ontvang het, toe die Luisterryke Majesteit die stem tot Hom laat kom het wat sê: “Hy is my Seun, my geliefde Seun, in wie Ek My verbly,” ¹⁸ het ook ons daardie stem gehoor wat uit die hemel kom, terwyl ons saam met Hom op die heilige berg was. ¹⁹ En daarom beskik ons oor die profetiese woord, wat nog vaster staan. Julle doen die regte ding as julle daarop fokus soos op 'n lamp wat in 'n donker plek skyn, totdat die dag aanbreek en die môrester opgaan in julle harte. ²⁰ Dit moet julle veral beseef: Geen profesie in die Skrif berus op eie uitleg nie. ²¹ Want geen profesie is ooit deur die wil van 'n mens voortgebring nie; maar meegevoer deur die Heilige Gees, het mense die woorde uitgespreek wat van God afkomstig is.*

2

Vals profete en leraars

¹ Daar was egter ook vals profete onder die volk, soos daar ook onder julle vals leraars sal wees* wat vernietigende ketterye sal insmokkel en

* **1:14 my tentwoning ... word:** 2 Kor 5:1

* **1:14 soos ... gemaak het:** Joh 21:18-19

* **1:17-18** Matt 17:1-5; Mark 9:2-7; Luk 9:28-35

* **1:21 meegevoer ... is:** 2 Tim 3:16; 1 Pet 1:11

* **2:1 daar ... wees:** Matt 24:11

selfs die Heer wat hulle vrygekoop het, verloën.* So bewerk hulle 'n skielike ondergang vir hulleself. ² Baie sal die losbandighede navolg van daardie mense deur wie se toedoen die pad van die waarheid belaster word.* ³ Deur hebsug gedrewe, sal hulle julle met versinde argumente uitbuit.* Hulle vonnis staan reeds lankal gereed; ja, hulle ondergang talm nie. ⁴ *Trouens,

as God die engele wat gesondig het, nie gespaar het nie, maar hulle oorgelewer het deur hulle met boeie in die digte duisternis van Tartarus^d te werp en hulle so tot met die oordeel gevange te hou;

⁵ en as Hy die antieke wêreld nie gespaar het nie, maar Noag, die boodskapper van •geregtigheid, saam met sewe ander bewaar het* toe Hy die vloed oor die goddelose wêreld gebring het;*

⁶ en as Hy die stede van Sodom en Gomorra tot as verbrand het toe Hy hulle tot vernietiging veroordeel* en van hulle 'n voorbeeld gemaak het van die dinge wat die goddeloses gaan tref;

⁷ *en as Hy die •regverdige Lot, diep gekwel deur die onsedelike leefwyse van beginsellose mense, gered het ⁸ — die regverdige man

*2:1 die Heer ... verloën: Jud vs 4

*2:2 deur ... word: Jes 52:5

*2:3 Deur ... uitbuit: Rom 16:18; 1 Thess 2:5

*2:4 1 Hen 6 -- 19 •Pseudepigrawe; Jud vs 6,13

^d2:4 Tartarus: Volgens die destydse wêreldbeeld 'n plek onderkant die aarde waar die geeste van afgestorwenes vertoef het in afwagting van die eindoordeel. Word ook vertaal “hel”.

*2:5 Noag ... bewaar het: Gen 8:18

*2:5 die vloed ... gebring het: 2 Pet 3:6

*2:6 en as ... veroordeel: Gen 19:24; Jud vs 7

*2:7 Gen 19:1-16

het, terwyl hy onder hulle gewoon het, op grond van wat hy gesien en gehoor het, sy regverdige siel^e dag in en dag uit oor hulle wettelose optrede gepynig;

⁹ dan weet die Here tog baie goed om daardie mense wat godvresend leef uit versoeking te red,* maar ook om die onregverdiges tot op die dag van oordeel gevange te hou sodat hulle gestraf kan word* — ¹⁰* veral dié wat agter die besoedelende begeerte van die natuurlike liggaam aanloop en wat gesag verag.

Hulle is roekelose, arrogante mense, hulle skram nie daarvan weg om die hemelse wesens te belaster nie; ¹¹ terwyl selfs engele, wat daardie wesens tog in sterkte en krag oortref, nie teen hulle 'n klag van laster voor die Here inbring nie.

¹² Aangesien hierdie mense — soos redelose diere, instinkmatige wesens, voortgebring net om gevang en geslag te word — oor dinge laster waaroor hulle onkundig is, sal hulle deur hulle vernietigende optrede ook vernietig word, ¹³ en as loon vir onreg sal hulle veronreg word. Hulle beskou dit as genotvol om helder oordag te fuif. Terwyl hulle saam met julle feesvier, is hulle skandvlekke wat hulle verlustig in hulle losbandigheid.* ¹⁴ Hulle oë is vol owerspel en hulle kry nie genoeg van sonde nie; hulle verlei onstandvastige siele;^f hulle harte is geoefen in hebsug; hulle is vervloektes! ¹⁵ Omdat hulle die reguit pad verlaat het,

^e**2:8 siel:** Die mens se gemoed met sy emosies en stemmings.

***2:9 dan ... red:** 1 Kor 10:13

***2:9 maar ... word:** Jud vs 6

***2:10-12** Jud vs 7-10

***2:13 Terwyl ... losbandigheid:** Jud vs 12

^f**2:14 siele:** Verwys hier na die mens in sy totale bestaan.

het hulle verdwaal en hulle begewe op die pad van Bileam, die seun van Bosor,⁸ wat lief was vir onregmatige loon.* ¹⁶ *Hy is egter tereggewys vir sy oortreding: 'n Donkie, wat stom is, het, deur met die stem van 'n mens te praat, 'n einde gemaak aan die profeet se waansin.

¹⁷ Hierdie mense is opgedroogde fonteine, miswolke voortgedryf deur 'n stormwind,* mense vir wie die diepste duisternis gereed staan.* ¹⁸ Want terwyl hulle aanmatigende onsin verkondig, lok hulle deur onsedelike liggaamlike drange diegene uit wat met moeite ontkom aan dié wat in dwaling leef — ¹⁹ mense wat aan hulle vryheid beloof, alhoewel hulle self slawe van die verderf is. 'n Mens is immers verslaaf aan dit waaraan jy toegee.* ²⁰ Trouens, as mense, nadat hulle deur die kennis van ons Here en Verlosser Jesus •Christus aan die besoedeling van die wêreld ontsnap het, tog weer daarin verstrik raak en daaraan toegee, is die einde vir hulle slegter as die begin.* ²¹ *Dit sou immers vir hulle beter gewees het as hulle die pad van die •geregtigheid nie leer ken het nie, as wanneer hulle dit wel leer ken het, net om dan weer af te wyk van die heilige gebod wat aan hulle oorgelewer is. ²² Op hulle is die waarheid van die volgende gesegdes van toepassing:

“'n Hond keer terug na sy eie braaksel,”* en

⁸**2:15 Bosor:** 'n Enkele ms en vroeë vertalings lui “Beor”, Bileam se pa volgens Num 22:5; 24:3,15.

***2:15 hulle begewe ... loon:** Num 22:7; Jud vs 11; Op 2:14

***2:16** Num 22:28

***2:17 Hierdie ... stormwind:** Jud vs 12

***2:17 mense vir wie ... staan:** Jud vs 13

***2:19 'n Mens ... toegee:** Joh 8:34

***2:20 is die ... begin:** Matt 12:45

***2:21** Luk 12:47-48

***2:22 'n Hond ... braaksel:** Spr 26:11

“'n Sog was haarself deur te rol in die modder.”^h

3

Doel van die brief en verwagting van die wederkoms

¹ Hierdie brief, geliefdes, is reeds die tweede een wat ek aan julle skryf. In beide probeer ek om, deur middel van herinnering, julle helder denke aan te wakker, ^{2*} sodat julle die woorde kan onthou wat voorheen deur die heilige profete uitgespreek is, en ook die opdrag van ons Here en Verlosser wat julle •apostels deurgegee het.

³ Julle moet veral dit weet: In die laaste dae sal spotters met hulle gespot opdaag — mense wat hulle lewens volgens hulle eie drange^{*} inrig⁴ en vra: “Wat het geword van die belofte van sy koms? Sedert die vaders ontslaapⁱ het, bly alles steeds soos dit van die begin van die skepping af was.”⁵ Hulle ignoreer dit willens en wetens dat daar lank reeds hemele^j bestaan, en ook 'n aarde wat deur die woord van God uit water en deur water tot stand gekom het.^{* 6*} En deur hierdie dinge is die antieke wêreld deur water oorstroom en het dit vergaan,⁷ maar die huidige hemele en die aarde word deur dieselfde woord vir vuur opsy gesit; dit word bewaar vir die oordeelsdag en die vernietiging van die goddelose mense.

⁸ Laat hierdie een saak egter nie by julle verbygaan nie, geliefdes:

^h**2:22 'n Sog ... modder:** Waarskynlik 'n bekende spreekwoord uit daardie tyd. Kan ook vertaal word “'n Sog wat haar laat was het, gaan rol weer in die modder.”

^{*}**3:2** Jud vs 17

^{*}**3:3 In die ... drange:** Jud vs 18

ⁱ**3:4 ontslaap:** Tegnieese term vir Christene wat sterf.

^j**3:5 hemele:** Volgens die destydse wêreldbeeld was daar verskillende hemele, waaronder die wolkehemel, die sterreheemel en die derde hemel waar God woon.

^{*}**3:5 lank ... gekom het:** Gen 1:6-9

^{*}**3:6** Gen 7:11-21; 2 Pet 2:5

By die Here is een dag soos duisend jaar, en duisend jaar soos een dag.*
⁹ Die Here stel nie die belofte uit, soos party mense dink nie.* Inteendeel, Hy is geduldig met julle, omdat Hy nie wil hê sommige mense moet verlore gaan nie, maar dat almal tot bekering moet kom.*¹⁰ Die dag van die Here sal egter kom soos 'n dief,* 'n dag waarop die hemele met 'n gedruis tot 'n einde sal kom en die elemente sal uitbrand en vergaan, en die aarde en wat daarop gedoen is, ontbloot sal word.^{k 11} As al hierdie dinge so sal vergaan, watter besondere mense moet julle dan nie wees nie — mense wat 'n heilige lewe lei en godvresend leef,¹² wat na die aanbreek van die dag van God uitsien en dit probeer bespoedig. Dit is die dag waarop die hemele, deurdat dit verbrand word, sal vergaan en die elemente sal uitbrand en wegsmelt.¹³ Maar ons verwag volgens sy belofte nuwe hemele en 'n nuwe aarde* waar •geregtigheid woon.*

¹⁴ Daarom, geliefdes, omdat julle hierdie dinge verwag, streef ernstig daarna om deur Hom in vrede, vlekkeloos en onberispelik bevind te word.¹⁵ En beskou die lankmoedigheid van ons Here as 'n geleentheid tot verlossing,* soos ook ons geliefde broer Paulus, volgens die wysheid wat aan hom gegee is, aan julle geskryf het,¹⁶ soos in al sy briewe waarin hy oor hierdie sake praat. Daarin kom sekere moeilik verstaanbare dinge voor wat onkundige en onstandvastige mense tot

***3:8 By ... soos een dag:** Ps 90:4

***3:9 Die Here ... dink nie:** Hab 2:3

***3:9 omdat Hy ... kom:** 1 Tim 2:4

***3:10 Die dag ... dief:** Matt 24:43-44; Luk 12:39-40; 1 Thess 5:2,4; Op 3:3; 16:15

^k**3:10 ontbloot sal word:** Sommige mss lui “verbrand sal word”; ander lui “nie gevind sal word nie”. Die oorspronklike lesing kan nie met sekerheid bepaal word nie.

***3:13 Maar ... aarde:** Jes 65:17; 66:22; Op 21:1

***3:13 waar ... woon:** Jes 60:21; 1 Kor 6:9-10; Op 21:27; 22:15

***3:15 beskou ... verlossing:** Rom 2:4; 2 Pet 3:9

hulle eie ondergang verdraai — soos hulle ook met die ander geskifte maak.

¹⁷ Julle dan, geliefdes, aangesien julle hierdie dinge vooruit weet — wees op julle hoede om nie deur die dwaling van beginsellose mense meegesleur te word* en so julle eie standvastigheid te verloor nie.*

¹⁸ Sorg dat julle aanhou groei in die genade en kennis van ons Here en Verlosser, Jesus •Christus.

Lofprysing

Aan Hom behoort die heerlikheid, nou en ook tot op die dag van die ewigheid. •Amen.

*3:17 Julle ... te word: Mark 13:5

*3:17 wees op ... verloor nie: 1 Kor 10:12